



**O‘ZBEKISTON RESPUBLIKASI  
MOLIYA VAZIRLIGI  
BUYRUQ**

2021 yil “21” dekabr

№ 163

Toshkent sh.

**O‘zbekiston Respublikasi Moliya vazirligining Korrupsiyaga qarshi kurashish  
va komplaens-nazorat bo‘limi to‘g‘risidagi nizomni tasdiqlash haqida**

O‘zbekiston Respublikasi Prezidentining 2021-yil 6-iyuldagi PQ-5177-son “Korrupsiyaga qarshi kurashish faoliyatini samarali tashkil etishga doir qo‘shimcha chora-tadbirlar to‘g‘risida”gi qaror ijrosini ta’minlash maqsadida,

**BUYURAMAN:**

1. O‘zbekiston Respublikasi Moliya vazirligining Korrupsiyaga qarshi kurashish va komplaens-nazorat bo‘limi to‘g‘risidagi nizom ilovaga muvofiq tasdiqlansin.
2. Korrupsiyaga qarshi kurashish va komplaens-nazorat bo‘limi (J.Berdiyev) Inson resurslarini rivojlantirish va xodimlarni ma’rurlash departamenti (A.Boboev) bilan kelishilgan holda ikki hafta muddatda Korrupsiyaga qarshi kurashish va komplaens-nazorat bo‘limi xodimlarining lavozim yo‘riqnomalarini ishlab chiqsin.
3. Mazkur buyruq ijrosini nazorat qilish vazir o‘rinbosari O. Isakov zimmasiga yuklatilsin.

Vazir



T. Ishmetov

**O‘zbekiston Respublikasi Moliya vazirligining  
Korrupsiyaga qarshi kurashish va komplayens-nazorat bo‘limi to‘g‘risidagi  
NIZOM**

Ushbu Nizom O‘zbekiston Respublikasi Prezidentining 2021 yil 6-iyuldagi PQ–5177-son “Korrupsiyaga qarshi kurashish faoliyatini samarali tashkil etishga doir qo‘shimcha chora-tadbirlar to‘g‘risida”gi qaroriga muvofiq O‘zbekiston Respublikasi Moliya vazirligining (bundan buyon matnda Vazirlik deb yuritiladi) Korrupsiyaga qarshi kurashish va komplayens-nazorat bo‘limining (bundan buyon matnda Komplayens-nazorat bo‘limi deb yuritiladi) maqsadi, vazifalari, funksiyalari, huquq va majburiyatlari hamda faoliyatini tashkil etish tartibini belgilaydi.

**1-bob. Umumiy qoidalar**

1. O‘zbekiston Respublikasi Moliya vazirligining Komplayens-nazorat bo‘limi Vazirlik markaziy apparatining tarkibiy tuzilmasi bo‘lib, bevosita O‘zbekiston Respublikasi moliya vaziriga (bundan buyon matnda Vazir deb yuritiladi) bo‘ysunadi.

2. Komplayens-nazorat bo‘limi o‘z faoliyatida O‘zbekiston Respublikasi Konstitutsiyasi va qonunlariga, O‘zbekiston Respublikasi Oliy Majlisi palatalarining qarorlariga, O‘zbekiston Respublikasi Prezidentining farmonlari, qarorlari va farmoyishlariga, boshqa normativ-huquqiy hujjatlar, O‘zbekiston Respublikasining “Korrupsiyaga qarshi kurashish to‘g‘risida”gi Qonuni, O‘zbekiston Respublikasi Prezidentinig 2017-yil 18-martdagi PQ-2847-son qarori bilan tasdiqlangan O‘zbekiston Respublikasi Moliya vazirligi to‘g‘risidagi nizomi, Vazirlik Hay‘atining qarorlari, Vazirlik buyruqlari, ko‘rsatmalari, shuningdek, mazkur Nizomga amal qiladi.

3. Komplayens-nazorat bo‘limi Vazirlik markaziy apparati, hududiy bo‘linmalar va Vazirlik huzuridagi tashkilotlar (bundan buyon matnda - moliya tizimi tashkilotlari deb yuritiladi) faoliyatiga korrupsiyaga qarshi kurashish tizimini joriy qilish va uni nazorat qilish bo‘yicha uslubiy rahbarlik qiladi.

4. Komplayens-nazorat bo‘limi korrupsiya holatlarini barvaqt aniqlash va oldini olish, ularning sabab va shart-sharoitlarini bartaraf etish, manfaatlar to‘qnashuviga yo‘l qo‘ymaslik hamda korrupsiyaga nisbatan murosasiz munosabatni shakllantirish choralarini ko‘rishga mas’ul hisoblanadi.

**2-bob. Komplayens-nazorat bo‘limini faoliyatini tashkil etish**

5. Komplayens-nazorat bo'limi boshlig'i Vazirlik tomonidan O'zbekiston Respublikasi Korrupsiyaga qarshi kurashish agentligi (bundan buyon matnda Agentlik deb yuritiladi) bilan birgalikda o'tkaziladigan ochiq tanlov asosida ishga qabul qilinadi.

6. Komplayens-nazorat bo'limi boshlig'ini lavozimidan ozod etish masalasi Agentlik bilan kelishiladi.

Bunda, Vazirlik tomonidan Agentlikka Komplayens-nazorat bo'limi boshlig'ini lavozimidan ozod etish haqidagi taqdimnomasi beriladi.

Ushbu taqdimnomada xodimni lavozimidan ozod etish sabablari, motivlari ko'rsatiladi. Taqdimnomaga xodimni lavozimidan ozod etish sabablari va motivlarini tasdiqlovchi hujjatlar (masalan, xodimning arizasi, ichki mehnat tartibi qoidalarini buzganligini ko'rsatuvchi ma'lumotlar va boshqa shu kabi hujjatlar) ilova qilinadi.

7. Agentlik tomonidan Komplayens-nazorat bo'limi boshlig'ini lavozimidan ozod etish sabablari, motivlari yetarli emas deb hisoblansa, shu jumladan Komplayens-nazorat bo'limi boshlig'i ta'qib qilinayotganligi haqida ma'lumotlarga ega bo'lsa, ushbu masalada Komplayens-nazorat bo'limining boshlig'i bilan suhbat o'tkazilishi mumkin.

8. Quyidagilar Komplayens-nazorat bo'limi boshlig'ini lavozimidan ozod etishni kelishishni rad etish uchun asos bo'ladi:

Komplayens-nazorat bo'limi boshlig'ini lavozimidan ozod etish uchun sabablar yetarli emas deb topilganda;

Komplayens-nazorat bo'limi boshlig'ining zimmasiga yuklatilgan vazifa va majburiyatlar doirasidan tashqari vazifalarni bajarmaganligi yoki o'ziga yuklatilgan vazifa va majburiyatlarni bajarganligi uchun ta'qib qilinganligi holati aniqlanganda.

9. Taqdim etilgan hujjatlar Agentlik tomonidan uch ish kuni ichida ko'rib chiqilib, Vazirlikka Komplayens-nazorat bo'limi boshlig'ini lavozimidan ozod etishni kelishish yoki kelishishning rad etilganligi sabablari ko'rsatilgan xat taqdim etiladi.

### **3-bob. Komplayens-nazorat bo'limining asosiy maqsadi, vazifa va funksiyalari**

10. Komplayens-nazorat bo'limining asosiy maqsadi moliya tizimi tashkilotlarida korrupsiyaga qarshi kurash bo'yicha ISO37001:2016 xalqaro standarti talablariga javob beruvchi kompleks tizimni, xususan, korrupsiyaga qarshi kurashish tizimini joriy etish va rivojlantirish, korrupsiyaviy holatlarni barvaqt aniqlash va ularning sabab va shart-sharoitlarini bartaraf etish, korrupsiyaviy xatti-harakatlar sodir etilishining oldini olish, tashkilot tizimi xodimlarida korrupsiyaga nisbatan murosasiz munosabatni shakllantirish maqsadida ularning huquqiy ongi va madaniyatini oshirish, tashkilot tizimida korrupsiyaga qarshi profilaktik chora-tadbirlarni tashkil etish, korrupsiyaga qarshi kurashish sohasidagi hujjatlar ijrosini ta'minlashdan iborat.

11. Quyidagilar Komplayens-nazorat bo'limining asosiy vazifalari hisoblanadi:  
moliya tizimi tashkilotlarining korrupsiyaga qarshi kurashish bo'yicha faoliyatini takomillashtirish;

moliya tizimi tashkilotlarida korrupsiyaga oid huquqbuzarliklarni profilaktika qilish va ularga qarshi kurashish;

moliya tizimi tashkilotlarida korrupsiyaga qarshi kurashish tizimini samarali ishlashini ta'minlash va nazorat qilish;

korrupsiyaga qarshi kurashish bo'yicha faoliyatni amalga oshiruvchi hamda unda ishtirok etuvchi boshqa davlat organlari va tashkilotlari bilan hamkorlikni olib borish.

12. Komplayens-nazorat bo'limi o'ziga yuklatilgan vazifalarga muvofiq quyidagi funksiyalarni amalga oshiradi:

***a) moliya tizimi tashkilotlarining korrupsiyaga qarshi kurashish bo'yicha faoliyatini takomillashtirish sohasida:***

Vazirlik tizimida korrupsiyaga qarshi kurashish bo'yicha chora-tadbirlarni amalga oshirishga qaratilgan ichki idoraviy hujjatlar loyihalarini ishlab chiqadi;

Vazirlikning korrupsiyaga qarshi kurashish bo'yicha chora-tadbirlarini ishlab chiqadi va tasdiqlash uchun tashkilot rahbariga kiritadi;

Vazirlikning faoliyatiga oid normativ-huquqiy hujjatlar va ichki idoraviy hujjatlarda aniqlangan korrupsiyaviy normalarni bartaraf qilish bo'yicha takliflarni ishlab chiqadi;

Vazirlik tomonidan ishlab chiqiladigan korrupsiyaga qarshi kurashish bo'yicha chora-tadbirlar loyihalarini Vazirlik tizimida korrupsiyaga qarshi kurashish siyosatiga mosligi, maqbulligi va dolzarbligi nuqtai nazardan baholaydi va xulosalar beradi;

Vazirlikda korrupsiyaga qarshi kurashish faoliyatini yanada samarali tashkil etish va takomillashtirishga qaratilgan aniq takliflarni Agentlikka kiritib boradi.

***b) Vazirlikda korrupsiyaga oid huquqbuzarliklarni profilaktika qilish va ularga qarshi kurashish sohasida:***

Vazirlikda korrupsiyaviy xavf-xatarlarni baholaydi, ularning natijalari bo'yicha aniqlangan xavf-xatarlarni kamaytirish yuzasidan chora-tadbirlar rejalarini ishlab chiqadi va tashkilotda korrupsiyaviy xavf-xatari yuqori bo'lgan lavozimlar ro'yxatini yaratadi;

Vazirlik tomonidan o'xshash huquqbuzarliklar sodir etilishi ehtimolini baholash maqsadida davlat hokimiyatining boshqa organlarida korrupsiyaviy xuquqbuzarliklar sodir etilishining holati va yo'nalishlari haqida ma'lumot to'playdi;

maxsus axborot aloqa kanallari orqali Vazirlik xodimlari tomonidan korrupsiyaviy xavf-xatarlar va xuquqbuzarliklar haqida kelib tushadigan murojaatlarni tahlil qiladi va ularni belgilangan tartibda ko'rib chiqilishini ta'minlaydi;

Vazirlikda yuritiladigan xizmat tekshiruvlari reyestri yoki o'tkazilgan xizmat tekshiruvlarini ro'yxatga oladigan boshqa tegishli hujjatda korrupsiya faktlariga doir xizmat tekshiruvlari bo'yicha ma'lumotlarning to'g'ri va to'liq aks ettirib borilishini nazorat qiladi;

davlat xaridlarini amalga oshirishda manfaatlar to'qnashuvini tahlil qilishda va Vazirlik bilan shartnomaviy munosabatlarga (mehnat munosabatlari bundan mustasno) kirishgan har qanday yuridik yoki jismoniy shaxslarning ishonchliligini tekshirish jarayonida ishtirok etadi;

Vazirlik xodimlariga korrupsiyaga qarshi kurashish masalalari bo'yicha tushuntirish va tavsiyalar beradi;

korrupsiya faktlari haqida xabar berishga mo'ljallangan maxsus axborot aloqa kanallarining faoliyat natijalarini tahlil qiladi va tahliliy materiallarni Vazirlik xodimlariga yetkazadi;

Vazirlik faoliyatidagi korrupsiyaviy holatlarni va xavf-xatarlarni aniqlash maqsadida aholi va xodimlar orasida so'rovlar o'tkazadi;

korrupsiyaga qarshi kurashishga oid talab va normalarning buzilishi masalalari bo'yicha intizomiy javobgarlikka tortilayotgan shaxslarga jazo choralarining mutanosibligi va yetarliligini nazorat qiladi;

korrupsiyaga qarshi kurashish tizimini yanada takomillashtirish maqsadida Vazirlikda korrupsiya faktlari yuzasidan o'tkazilgan xizmat tekshiruvlari natijalari haqidagi ma'lumotlarni taxlil qiladi;

har chorakda va Vazirning talabiga ko'ra Vazirlikda korrupsiyaga qarshi kurashish bo'yicha amalga oshirilgan ishlar hamda ulardagi korrupsiyaviy holat haqida Vazirga ma'lumot kiritib boradi;

***v) Vazirlikda korrupsiyaga qarshi kurashish tizimini samarali ishlashini ta'minlash va nazorat qilish sohasida:***

korrupsiyaga qarshi kurashish bo'yicha davlat dasturlarida Vazirlikga yuklatilgan vazifalar ijrosini monitoring qiladi va nazoratini amalga oshiradi;

Vazirlik tizimida korrupsiyaga qarshi kurashish tizimining ISO37001:2016 Korrupsiyaga qarshi xalqaro standarti talablariga mosligini ta'minlaydi;

Vazirlik xodimlarining malakasini oshirish bo'yicha o'quv rejalarining korrupsiyaga qarshi normalarga oid qismini ishlab chiqishda ishtirok etadi;

Vazirlik xodimlari, shu jumladan korrupsiyaviy xavf-xatari yuqori bo'lgan lavozimlardagi xodimlar uchun korrupsiyani oldini olish bo'yicha o'quv materiallarini ishlab chiqadi;

o'quv rejaga muvofiq Vazirlikning barcha xodimlari uchun korrupsiyaga qarshi kurashish bo'yicha treninglarning o'tkazilishini hamda ularda xodimlarning ishtirok etishini nazorat qiladi;

Vazirlik tizimi xodimlari va fuqarolar o'rtasida korrupsiyaga qarshi kurashish bo'yicha targ'ibot tadbirlarida ishtirok etadi;

Vazirlikning rasmiy veb-saytidagi "Korrupsiyaga qarshi kurashish" bo'limi hamda ijtimoiy tarmoqlaridagi sahifalariga joylashtirilgan ma'lumotlarni yangilanib borilishini ta'minlaydi;

Vazirlik tizimidagi xodimlar tomonidan korrupsiyaga qarshi kurashish sohasidagi O'zbekiston Respublikasining qonunchiligiga va tashkilotning korrupsiyani oldini olish va unga qarshi kurashish bo'yicha ichki hujjatlariga rioya qilinishini monitoring va nazorat qiladi;

Vazirlik tizimidagi korrupsiyaviy xatti-harakatlar bo'yicha xizmat tekshiruvlarini o'tkazish tashabbusini ilgari suradi va unda ishtirok etadi;

odob-ahloq komissiyalari tomonidan manfaatlar to'qnashuvini tartibga solish bo'yicha qabul qilingan qarorlarning xolisligi va maqbulligini tekshiradi;

amalga oshirilgan monitoring, xizmat tekshiruvlari va nazorat tadbirlari natijalari bo'yicha korrupsiyaga qarshi kurashish tizimini takomillashtirish yuzasidan tavsiyalar ishlab chiqadi;

Vazirlik tizimidagi korrupsiyaga qarshi kurashishga mas'ul tuzilma(shaxs)lar bilan hamkorlikda korrupsiyaga qarshi kurashish bo'yicha ishlarni tashkil etish va xodimlarning huquqiy savodxonligini oshirishga qaratilgan konferensiyalar, uchrashuvlar, seminarlar, tanlovlar va boshqa tadbirlarni tashkil etadi;

Vazirlik faoliyati uning korrupsiyaga qarshi kurashish bo'yicha ichki hujjatlariga hamda xalqaro standartlarga muvofiqligi yuzasidan tekshiruvlar o'tkazadi;

***g) korrupsiyaga qarshi kurashish bo'yicha faoliyatni amalga oshiruvchi hamda unda ishtirok etuvchi boshqa davlat organlari va tashkilotlari bilan hamkorlikni olib borish sohasida:***

aholining huquqiy ongi va huquqiy madaniyatini yuksaltirishga, jamiyatda korrupsiyaga nisbatan muhosasiz munosabatni shakllantirishga doir chora-tadbirlarning ishlab chiqilishida ishtirok etadi;

qonunchilik hujjatlari bilan Vazirlik zimmasiga yuklatilgan korrupsiyaga qarshi kurashish bo'yicha vazifalarga muvofiq xorijiy davlatlarning vakolatli organlariga zarur axborotni taqdim etish to'g'risida so'rovlar yuboradi va ularning so'rovlariga javob berishda ishtirok etadi;

Vazirlikning korrupsiyaga qarshi kurashish chora-tadbirlarini takomillashtirish yuzasidan xorijiy mutaxassislarni jalb etish bo'yicha takliflar ishlab chiqadi;

korrupsiyaviy xatti-harakatlarni bartaraf qilish yoki korrupsiyaviy jinoyatlarni tergov qilish bo'yicha tadbirlarni amalga oshirishda huquqni muhofaza qiluvchi organlar bilan hamkorlik qiladi.

Komplayens-nazorat bo'limi qonunchilik hujjatlariga muvofiq boshqa funksiyalarni ham amalga oshiradi.

13. Komplayens-nazorat bo'limiga va bo'limning xodimlariga ushbu Nizom va boshqa qonunchilik hujjatlarida nazarda tutilmagan funksiyalarning yuklatilishiga yo'l qo'yilmaydi.

#### **4-bob. Nazorat tuzilmalarining huquq va majburiyatlari**

14. Komplayens-nazorat bo'limi o'z zimmasiga yuklatilgan vazifalar va funksiyalarni bajarish uchun quyidagi huquqlarga ega:

Vazirlik tizimidagi xodimlaridan ularning vakolatiga kiruvchi masalalar yuzasidan tahliliy materiallarni, xulosalarni, statistik va boshqa ma'lumotlarni olish;

xizmat majburiyatlarini bajarish doirasida Vazirlik tizimidagi xodimlaridan zarur yordam so'rash va olish;

Vazirlik tizimidagi xodimlari faoliyatida aniqlangan korrupsiyaviy huquqbuzarliklar yuzasidan xizmat tekshiruvlarini o'tkazish;

Vazirlik rahbariyatiga korrupsiyaga qarshi kurashish tizimini takomillashtirish bo'yicha takliflar kiritish;

Vazirlik va tizimidagi tashkilotlarga yozma ko'rsatmalar, topshiriq xatlari va tavsiyalar berish;

Vazirlik va tizimidagi tashkilotlarning korrupsiyaga oid majlislarida ishtirok etish; tekshiruvlar o'tkazish, hujjatlarni talab qilish, xodimlardan yozma tushuntirishlar olish.

Komplayens-nazorat bo'limi qonunchilik hujjatlariga muvofiq boshqa huquqlarga ham ega bo'lishi mumkin.

15. Komplayens-nazorat bo'limi o'z zimmasiga yuklatilgan vazifalar va funksiyalarni bajarish uchun quyidagi majburiyatlarga ega:

ushbu Nizom va boshqa qonunchilik hujjatlari bilan yuklatilgan funksiyalarni zarur darajada va samarali bajarish;

qonunchilik hujjatlari talablariga qat'iy rioya qilish va o'z vakolat doirasidan chetga chiqmaslik;

Vazirlik tizimida jinoyat alomatlari, xususan korrupsiya holatlari aniqlanganligi to'g'risida zudlik bilan to'g'ridan-to'g'ri Vazirga, Agentlik va boshqa huquqni muhofaza qiluvchi organlarga xabar berish;

Vazirlik va tizimdagi tashkilotlarning korrupsiyaga qarshi kurashish siyosati, odob-axloq qoidalarining korrupsiyaga oid qismining buzilganligi fakti yuzasidan Vazirlik rahbariyatiga ma'lumotnomalar kiritish;

har chorakda, keyingi chorak birinchi oyining birinchi o'n kunligida korrupsiyaga qarshi kurashish borasida amalga oshirilgan ishlar va chora-tadbirlar to'g'risidagi choraklik hisobotni Agentlikka taqdim etish;

Komplayens-nazorat bo'limi xodimlari qonunchilik hujjatlariga muvofiq boshqa majburiyatlarga ham ega bo'lishi mumkin.

16. Komplayens-nazorat bo'limi xodimlari korrupsiyaga qarshi kurashish sohasida faoliyat yurituvchi xodimlarga mo'ljallangan o'quv kurslari yoki maxsus seminar-treninglarda ishtirok etadi. O'quv kurslari yoki maxsus seminar-treninglar Vazirlik yoxud Agentlik tomonidan tashkil etilishi mumkin.

17. Komplayens-nazorat bo'limi faoliyatining natijadorligi Vazirlik tizimida korrupsiyaga qarshi kurashish tizimining samaradorlik va maqsadli ko'rsatkichlariga erishish natijalariga asosan baholanadi.

Komplayens-nazorat bo'limi faoliyatining maqsadli ko'rsatkichlari Vazir tomonidan tasdiqlanadi.

Komplayens-nazorat bo'limi faoliyati samaradorligining maqsadli ko'rsatkichlariga erishish ustidan nazorat Agentlik tomonidan amalga oshiriladi.

## **5-bob. Yakuniy qoidalar**

18. Ushbu Nizom talablarini buzganlikda aybdor deb topilgan shaxslar qonunchilikda belgilangan tartibda javobgar bo'ladi.